

Regenza: Proceder sco previs cul rumantsch grischun

■ **(anr/gc) En vista al fatg ch'adina pli bleras vischnancas rumantschas din na al rumantsch grischun en scola – e pervi da la gronda opposiziun, spezialmain en Engiadina – han ins dumandà ier tar l'inscunter tranter la Regenza ed ils represchentants dals meds da massa, sch'ella restia tar ses concept da basa preschentà ed il proceder previs. Il schef dal departament d'educaziun, cuss. gov. Claudio Lardi, ha respundì cun in fitg cler gea.** Il Cussegl grond haja decidì che davent da 2005 vegnian ils meds d'instrucziun edids be pli el linguatg unifitgà. Las votaziuns consultativas en las vischnancas na libereschian betg la Regenza da sia obligaziun dad agir segund quest conclus. Era da returnar la questiu – per reponderaziun al Cussegl grond – na ve-

gnia betg en dumonda. La Regenza saja decidida da realisar ses concept da basa.

Agir saja indispensabel, siond che davent da 2005 na dettia i betg pli novs meds d'instrucziun en ils idioms, ma bain sulettamain en rumantsch grischun. Ed era en quest grau na gidian las decisziuns negativas en las vischnancas nagut. El deplorascha ch'ins n'haja betg dà en las vischnancas al Chantun la pussaivladad dad infurmar davart ses pugn da vista pertutgant il rumantsch grischun avant che decider. Ins prefereschia e speria dentant anc adina da pudair far quei pass voluntariamain e na tras sforz.

Far tut per avair access al chastè da Tarasp

Il chastè da Tarasp en l'Engiadina bassa è venal. Uschia ha era la Societad istori-

ca dal Grischun scrit a la Regenza da far tut il pussaivel per ch'ins possa segirar a tuts en l'avegnir l'access a quei impurtant edifizis per il Grischun e per l'Engiadina en spezial. Ins vesess – sco basa da partenza per l'acquist – l'erecziun d'ina fundaziun tranter Chantun, regiun e vischnancas. Anc n'ha la Regenza betg respundì sin l'intervenziun da la societad menziunada. Gugent vesess ins, sche cuss. gov. Klaus Huber, che banduna en curt il guvern, surpigliass il presidi da questa fundaziun.

Supplement da chareschia

Ils proxims dis vegn la Regenza a fixar il supplement da chareschia per il personal dal Chantun. Ella sa basa sin quella dal mais da november (l'october eri 1, 3 puncts). L'auitezza minus 0,5 pertschient

dat la summa definitiva che vegn pajada. El budget è previs 1 pertschient per suenter. Probabel èsi pli pauc. L'entira chassa saja dentant discutabla.

Prendì cumià

La sesida da december da la Regenza cun ils represchentants da la pressa e dals meds electronics è vegnida anticipada sin la fin da november, cunquai ch'igl è l'autra emna Cussegl grond. Igl è stà il davos inscunter da quest onn e per il president da la Regenza, cuss. gov. Klaus Huber, l'ultima in summa, siond ch'el banduna cun la fin da quest onn la Regenza. El ha engrazià per la buna collavuraziun durant ils diesch onns passads e ludà la cultura da comunicaziun en noss Chantun. Sia contribuziun latiers è era vegnida renconuschida.